

Na osnovu člana 7. stav 2. Zakona o budžetima u Federaciji Bosne i Hercegovine („Službene novine Federacije Bosne i Hercegovine“, broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22) i člana 32. stav 1. tačka 2. Statuta Općine Velika Kladuša („Službeni glasnik Općine Velika Kladuša“, broj: 12/11), Općinsko vijeće općine Velika Kladuša na svojoj III redovnoj sjednici održanoj dana 30.12.2024. godine, donijelo je

ODLUKU

o izvršavanju budžeta Općine Velika Kladuša za 2025. godinu

I – OPĆE ODREDBE

Član 1.

(Predmet Odluke)

Ovom Odlukom uređuje se struktura prihoda i primitaka, te rashoda i izdataka budžeta općine Velika Kladuša za 2025. godinu (u daljem tekstu: Budžet), način njegovog izvršavanja, prioriteta plaćanja, obim zaduživanja i izdavanja garancija, upravljanje dugom, te finansijskom i nefinansijskom imovinom, prava i obaveze korisnika budžetskih sredstava, ovlaštenja u izvršavanju budžeta za 2025. godinu, kazne za neispunjenje obaveza, te druga pitanja vezana uz izvršenje budžeta.

Član 2.

(Pojam Budžeta)

Budžet je procjena godišnjih prihoda i primitaka, te utvrđenih iznosa rashoda i izdataka, koji na prijedlog Općinskog načelnika donosi Općinsko vijeće. Svaka izmjena i dopuna budžeta vrši se po istom postupku koji se primjenjuje kod usvajanja budžeta.

Član 3.

(Struktura Budžeta)

Budžet se sastoji od općeg i posebnog dijela. Opći dio Budžeta se sastoji od računa prihoda i rashoda, računa kapitalnih primitaka i izdataka, i računa finansiranja, a posebni dio sadrži detaljan raspored izdataka po budžetskim korisnicima i vrsti izdataka.

U bilansu prihoda i izdataka iskazani su porezni i neporezni prihodi i drugi prihodi i primici, te izdaci utvrđeni za finansiranje javnih izdataka na nivou općine Velika Kladuša na osnovu zakonskih i drugih propisa.

Član 4.

(Fiskalna godina)

Budžet se donosi i važi za fiskalnu 2025. godinu (u daljem tekstu: fiskalna godina).

Fiskalna godina počinje 1. januara, a završava 31. decembra 2025. godine.

Član 5.

(Fiskalna odgovornost)

Rukovodilac budžetskog korisnika je odgovoran za:

1. zakonito i namjensko korištenje sredstava i

2. efikasno i uspješno funkcioniranje sistema finansijskog upravljanja i kontrole u okviru budžetom utvrđenih sredstava.

Rukovodilac je dužan svake godine za prethodnu budžetsku godinu za period u kojem je obavljao poslove rukovodioca popuniti izjavu o fiskalnoj odgovornosti (u daljnjem tekstu: izjava).

Rukovodioci budžetskih korisnika izjavu dostavljaju Službi za finansije, računovodstvo i javne nabavke koja provjerava njen sadržaj, dok rukovodilac Općinskog organa uprave izjavu dostavlja nadležnom Kantonalnom ministarstvu finansija.

Oblik i sadržaj izjave, način popunjavanja i rok predaje izjave, te način i rokove izvještavanja utvrđeni su Pravilnikom o obliku, sadržaju, načinu popunjavanja i predaji izjave o fiskalnoj odgovornosti („Službene novine F BiH“, broj: 34/14).

II – IZVRŠAVANJE BUDŽETA

Član 6.

(Budžetski korisnici)

Budžetski korisnici općine Velika Kladuša su: Jedinstveni općinski organ uprave (Općinsko vijeće, Kabinet načelnika i službe općinske uprave), javne ustanove (Centar za socijalni rad i Centar za kulturu i obrazovanje „Zuhdija Žalić“) i Općinsko pravobranilaštvo.

Registar budžetskih korisnika vodi Služba za finansije, računovodstvo i javne nabavke po propisanoj budžetskoj klasifikaciji.

Član 7.

(Namjensko korištenje sredstava)

Sredstva Budžeta osiguravaju se budžetskim korisnicima (u daljnjem tekstu: korisnici) koji su u posebnom dijelu budžeta određeni za nosioce sredstava na pojedinim pozicijama.

Korisnici mogu budžetska sredstva koristiti samo za namjene koje su određene budžetom, i to do visine utvrđene u njegovom posebnom dijelu.

Korisnicima nije dozvoljeno da stvaraju obaveze, odnosno rashode ili opterećenje budžetskih pozicija, ako ti rashodi ili opterećenja budžetskih pozicija nisu odobreni u okviru iznosa alociranog za tog korisnika.

Član 8.

(Naplata prihoda)

Budžetski korisnici odgovorni su za potpunu i pravovremenu naplatu prihoda i primitaka iz svoje nadležnosti, za njihovu uplatu u budžet i za izvršavanje svih rashoda i izdataka u skladu sa namjenama.

Budžetski korisnik je dužan provesti sve zakonom propisane radnje radi naplate potraživanja na osnovu ugovora ili bilo kojeg drugog potraživanja na osnovu javnih prihoda.

Za nenaplativa potraživanja Općinski načelnik na obrazloženi prijedlog budžetskog korisnika može donijeti odluku o otpisu potraživanja.

Budžetski korisnici odgovorni su za zakonito, namjensko, efikasno i ekonomično raspolaganje budžetskim sredstvima.

Član 9.

(Način korištenja sredstava Budžeta)

Korisnici koriste sredstva Budžeta u skladu sa svojim godišnjim finansijskim planom, usklađenim sa budžetom, a po dinamici utvrđenoj tromjesečnim i mjesečnim planovima.

Član 10.

(Dinamika odobravanja sredstava)

Korisnici mogu preuzimati obaveze za koje su sredstva namjenski iskazana u posebnom dijelu Budžeta ako je njihovo plaćanje usklađeno s tromjesečnim i mjesečnim planovima za izvršavanje Budžeta.

Iznimno, zbog neusklađenosti priliva sredstava u Budžetu, prema tromjesečnim i mjesečnim planovima izdataka, Služba za finansije, računovodstvo i javne nabavke može izmijeniti dinamiku sredstava pojedinim korisnicima uz saglasnost Općinskog načelnika.

Član 11.

(Priprema operativnih planova)

Služba za finansije, računovodstvo i javne nabavke donosi instrukciju o pripremanju i podnošenju operativnih planova korisnika.

Korisnici sredstava su obavezni Službi za finansije, računovodstvo i javne nabavke dostavljati tromjesečne finansijske planove za izvršavanje budžeta 15 dana prije početka tromjesečja, a do 25-tog u mjesecu dužni su dostavljati prijedlog mjesečnog finansijskog plana za slijedeći mjesec.

Prijedlozi operativnih planova obuhvataju rashode za svaki mjesec.

Ako korisnik sredstava Službi za finansije, računovodstvo i javne nabavke ne podnese prijedlog mjesečnog ili tromjesečnog finansijskog plana u rokovima iz stava 2. ovog člana, mjesečni plan za tog korisnika utvrdit će Služba za finansije, računovodstvo i javne nabavke.

Član 12.

(Nadzor nad izvršenjem)

Rashodi svakog korisnika ne mogu prelaziti iznose alociranih budžetskih sredstava odobrenih za svaki mjesec ili drugi vremenski period koji utvrdi Služba za finansije, računovodstvo i javne nabavke.

Općinski načelnik ima pravo obustaviti od izvršenja svaki akt koji je u suprotnosti sa ovom Odlukom i Zakonom o budžetima u Federaciji Bosne i Hercegovine („Službene novine F BiH“, broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22).

Član 13.

(Raspored neplaniranih namjenskih primitaka)

Budžet se izvršava u skladu sa njegovim mogućnostima i dinamikom priliva sredstava.

Ovlašćuje se Općinski načelnik da može izvršiti raspored eventualnih neplaniranih namjenskih prihoda, primitaka i donacija u Budžetu općine Velika Kladuša za 2025. godinu, te da se takva sredstva naknadno prikažu prilikom eventualnog rebalansa Budžeta ili u izvještaju o izvršenju Budžeta kao sastavni dio Budžeta za 2025. godinu.

Donacije, potpore, grantovi koji nisu planirani u budžetu, a ostvare se u toku godine, prikazaće se kao prihod Budžeta i namjenski će se usmjeravati, te će se izvršiti povećanje Budžeta na rashodovnoj strani odnosnog budžetskog korisnika.

Namjenski prihodi i primici koji nisu iskorišteni u prethodnoj godini prenose se u budžet za tekuću budžetsku godinu.

Član 14.

(Postupak nabavke roba, usluga i radova)

Postupak nabavke roba, usluga i radova mora se obavljati u skladu sa odredbama Zakona o javnim nabavkama Bosne i Hercegovine („Službeni glasnik BiH“, broj: 39/14, 59/22 i 50/24).

Član 15.

(Preraspodjela sredstava)

Općinski načelnik, na prijedlog budžetskog korisnika, može donijeti odluku o prestrukturiranju rashoda u okviru ukupnog iznosa odobrenog za budžetskog korisnika, najviše do 10% ukupno odobrenih rashoda za budžetskog korisnika.

U okviru odobrenog Budžeta, preraspodjela sredstava, najviše do 10% ukupno odobrenih rashoda za budžetskog korisnika iznimno je dozvoljena između budžetskih korisnika, o čemu odlučuje Općinski načelnik na osnovu zahtjeva budžetskog korisnika uz koji se prilaže određena dokumentacija na osnovu koje se daje na uvid razlozi za dodatnim sredstvima na budžetskoj stavci koja se povećava do kraja godine, odnosno razlozi za smanjenje odobrenih budžetskih stavki.

Član 16.

(Uplata javnih prihoda)

Svi javni prihodi i primici budžeta, uključujući i prihode koje korisnici budžeta ostvaruju obavljanjem osnovne djelatnosti po posebnim propisima, uplaćuju se na depozitni račun općine Velika Kladuša i iskazuju se po izvorima iz kojih potiču.

Prihodi ostvareni po osnovu Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“ broj 39/03, 22/06 i 43/10) evidentiraju se na posebnom transakcijskom računu koji je u sastavu jedinstvenog računa trezora i koriste se u skladu sa Odlukom o uvjetima i načinu korištenja sredstava po osnovu posebne naknade za zaštitu od prirodnih i drugih nesreća („Službene novine Federacije BiH“ broj 4/12, 80/13 i 20/20).

Prihodi ostvareni po osnovu naknada za izgradnju skloništa u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“ broj: 39/03, 22/06 i 43/10) evidentiraju se na posebnom transakcijskom računu koji je u sastavu jedinstvenog računa trezora i koriste se za izgradnju i održavanje javnih skloništa.

Namjenski prihodi i primici koji nisu iskorišteni u prethodnoj godini prenose se u budžet za tekuću budžetsku godinu.

Član 17.

(Povrat više ili pogrešno uplaćenih prihoda)

Povrat više ili pogrešno uplaćenih javnih prihoda u tekućoj godini vrši se na teret odgovarajućih prihoda tekuće godine, iz tekućeg priliva korisnika prihoda, a povrat prihoda koji nisu uplaćeni u tekućoj godini vrši se sa transakcijskih računa korisnika javnih prihoda, u

skladu sa odredbama važećeg Pravilnika o načinu uplate javnih prihoda budžeta i vanbudžetskih fondova na teritoriji Federacije BiH.

Rješenje o povratu više ili pogrešno uplaćenih javnih prihoda donosi Općinski načelnik, odnosno lice koje on ovlasti, a na osnovu zahtjeva Ministarstva finansija USK-a, pravnog ili fizičkog lica.

Član 18.

(Troškovi službenog puta)

Visina dnevnica, naknada za putne i druge troškove koji nastanu u vezi službenih putovanja, za sve korisnike koji se finansiraju iz sredstava Budžeta općine određuje se na osnovu Uredbe o naknadama troškova za službena putovanja („Službene novine Federacije Bosne i Hercegovine“, broj: 44/16, 50/16 i 31/23), te Pravilnika o naknadama troškova za službena putovanja („Službeni glasnik općine Velika Kladuša“, broj: 7/18).

Član 19.

(Sredstva za plaće i naknade)

Visina plaće, naknada i drugih ličnih primanja uposlenih u Jedinstvenom općinskom organu uprave Općine Velika Kladuša isplaćivat će se u skladu sa Odlukom Općinskog vijeća o plaćama i naknadama u Jedinstvenom općinskom organu uprave Općine Velika Kladuša.

Osnovica za obračun plaće u visini od 400 i bod u iznosu od 1,15 primjenjivat će se od 01.01.2025. godine do 31.12.2025. godine.

Član 20.

(Naknade općinskim vijećnicima)

Naknada za vršenje funkcije vijećnika u Općinskom vijeću i radnim tijelima vijeća, te pravo na dnevnicu i putne troškove vijećnika isplaćivat će se u skladu sa Odlukom Općinskog vijeća o visini naknada koje se isplaćuju općinskim vijećnicima („Službeni glasnik općine Velika Kladuša“, broj: 4/10).

Član 21.

(Tekuća budžetska rezerva)

Sredstva tekuće rezerve planirana u budžetu koriste se za:

- a) Nepredviđene namjene za koje u budžetu nisu planirana sredstva ili za namjene koje se tokom godine pokaže da za njih nisu utvrđena dovoljna sredstva jer ih pri planiranju budžeta nije bilo moguće predvidjeti.
- b) Finansiranje hitnih i nepredviđenih izdataka za sponzorstva i pokroviteljstva, kada se kao sponzor ili pokrovitelj pojavljuje općina Velika Kladuša.
- c) Finansiranje dijela hitnih i nepredviđenih troškova za učešće pojedinaca i udruženja građana ili sportskih klubova sa područja Općine na svjetskom, evropskom i državnim takmičenjima, manifestacijama i skupovima, ako se takvo učešće nije moglo predvidjeti na početku fiskalne godine.
- d) U drugim slučajevima kada Općinski načelnik utvrdi da je korištenje sredstava budžetske rezerve za pokriće hitnih i nepredviđenih izdataka od interesa za Općinu a od koristi licima koja su bolesna, u stanju socijalne potrebe i sl.

O korištenju sredstava tekuće rezerve, na osnovu pojedinačnih zahtjeva odlučuje Općinski načelnik donošenjem zaključka o odobravanju sredstava budžetske rezerve, a na osnovu Pravilnika o korištenju sredstava tekuće rezerve.

Sredstva tekuće rezerve iz stava 1. ovog člana mogu iznositi najviše do 3 % budžetskih prihoda bez namjenskih prihoda, vlastitih prihoda i bez primitaka.

Općinski načelnik kvartalno izvještava Općinsko vijeće o korištenju sredstava tekuće rezerve Budžeta kroz periodične izvještaje o izvršenju budžeta.

Član 22.

(Održavanje čistoće javne higijene)

Sredstva predviđena u Budžetu općine za finansiranje usluga održavanja čistoće javne higijene, održavanja javnih saobraćajnih površina, održavanje grada u zimskom periodu, održavanje gradskog groblja - nepredviđeni radovi vršit će se prema Programu Zajedničke komunalne potrošnje za 2025. godinu kojeg usvaja Općinsko vijeće na prijedlog Općinskog načelnika, a poslove obavlja JKUP „Komunalije“ doo Velika Kladuša.

Sredstva za održavanje javne rasvjete predviđena u budžetu općine za 2025. godinu koristit će se za održavanje javne rasvjete i potrošnju električne energije u skladu sa Programom Zajedničke komunalne potrošnje za 2025. godinu, a na osnovu Ugovora o održavanju javne rasvjete koji potpisuje Općinski načelnik sa JKUP „Komunalije“ doo Velika Kladuša.

Član 23.

(Održavanje lokalnih puteva u zimskom periodu)

Sredstva predviđena u Budžetu općine za finansiranje održavanja lokalnih puteva u zimskom periodu vršit će se prema Programu Zajedničke komunalne potrošnje za 2025. godinu, a izvršava ga JKUP „Komunalije“ doo Velika Kladuša.

Član 24.

(Ugovorene i druge posebne usluge)

Sredstva utvrđena u Budžetu kao izdaci za rad komisija koristiće se za isplatu naknada članovima komisija organizovanih za obavljanje poslova u skladu sa aktom Općinskog načelnika ili Općinskog vijeća, a na osnovu podnesenog izvještaja o radu komisije.

Sredstva utvrđena u Budžetu, pozicija „Izrada projektne dokumentacije i usluge nadzora nad projektima“ koristit će se za finansiranje projektne dokumentacije i usluga nadzora nad izvođenjem radova za projekte koji nisu direktno vezani za kapitalni projekat planiran budžetom, a u skladu sa potpisanim ugovorom, nakon provedenog postupka javne nabavke.

Sredstva za obavljanje hitnih intervencija na zgradama utvrđena u Budžetu će se koristiti na osnovu Pravilnika koji donosi Općinski načelnik, a u skladu sa Zakonom o korištenju, upravljanju i održavanju zajedničkih dijelova i uređaja zgrada.

Sredstva utvrđena u Budžetu, pozicija: JKUP "Komunalije" doo Velika Kladuša, sredstva za functionisanje i rad privremenog skloništa za životinje koristit će se za finansiranje rada Azila za životinje na osnovu ugovora potpisanog između općine Velika Kladuša i JKUP „Komunalije“ doo Velika Kladuša.

Sredstva utvrđena u Budžetu, pozicija „Sredstva za finansiranje projekta uređenja nereguliranog korita rijeke Kladušnice“ koristit će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Član 25.

(Grantovi nižim nivoima vlasti)

Sredstva utvrđena u Budžetu, pozicija: „Transfer za kulturu“ koristit će se za finansiranje radova: Izrada projekta konzervatorsko – restauracijskih radova na Starom gradu Podzvizd što je u skladu sa namjenom za koju su sredstva dobijena.

Sredstva utvrđena u Budžetu, pozicija „Transfer za izbore – Općinska izborna komisija“ koristit će se za isplatu neto naknade članovima biračkog odbora angažiranih tokom lokalnih izbora 2024. godine te za finansiranje naknade za rad Općinske izborne komisije, u skladu sa odlukama Centralne izborne komisije BiH.

Sredstva utvrđena u Budžetu, pozicija: „Transfer za razvoj turizma“ koristit će se za razvoj i unapređenje turističke ponude općine Velika Kladuša u skladu sa Zakonom o turizmu („Službeni glasnik USK-a“, broj: 25/20).

Član 26. (Grantovi pojedincima)

Raspodjela sredstava u okviru razdjela 10, ekonomski kod 614234 – Isplate stipendija vršit će se prema Pravilniku o dodjeli stipendija koji na prijedlog Općinskog načelnika usvaja Općinsko vijeće.

Raspodjela sredstava u okviru razdjela 10, ekonomski kod 614239-001 - Ostali transferi pojedincima-februarska nagrada dodijelit će se dobitniku iste, u skladu sa aktom Općinskog vijeća.

Raspodjela sredstava u okviru razdjela 10, ekonomski kod 614239-002 – Materijalno obezbjeđenje za učesnike NOR-a vršit će se u skladu sa Odlukom Općinskog vijeća o osnovnom obezbjeđenju boraca narodnooslobodilačkog rata općine Velika Kladuša („Službeni glasnik općine Velika Kladuša“, broj: 4/99).

Sredstva utvrđena u Budžetu, pozicija „Sredstva za finansiranje troškova za socijalne kategorije građana“ koristit će se za finansiranje troškova građana u stanju socijalne potrebe kao što su priključak na komunalnu infrastrukturu (voda, struja), kao i druge troškove koje građani u stanju socijalne potrebe ne mogu sami finansirati (trošak vode, el.energije, i sl.). Trošak će se priznavati na osnovu odluke Općinskog načelnika.

Sredstva utvrđena u Budžetu, pozicija: „Ostali transferi pojedincima – naknada materijalne štete koristit će se za isplatu naknade materijalne štete građanima a koja nastane uginućem sitne i krupne stoke zbog napada divljih ili domaćih životinja (pasa lualica i sl.), bolesti, ili sl. Naknada će se priznavati na osnovu internog akta kojeg donosi Općinski načelnik na prijedlog nadležne službe.

Sredstva utvrđena u Budžetu, pozicija: „Ostali transferi pojedincima - sufinansiranje medicinski potpomognute oplodnje koristit će se u skladu sa posebnim internim aktom koji donosi Općinski načelnik na osnovu prijedloga nadležne službe.

Sredstva utvrđena u Budžetu, pozicija Transfer za posebne namjene – elementarne nepogode su namjenska sredstva za zaštitu i spašavanje, koja se prikupe u tekućoj godini kao i sredstva akumulirana iz prethodnih godina, a koriste se u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine FBiH“, broj: 39/03, 22/06 i 43/10) i Odlukom o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine FBiH“, broj: 4/12,

80/13 i 20/20), a na osnovu godišnjeg plana korištenja sredstava za zaštitu i spašavanje, kojeg izrađuje Služba za civilnu zaštitu, uz Odluku Općinskog štaba civilne zaštite, na osnovu pojedinačnih odluka Općinskog načelnika.

Sredstva predviđena na kodu „Transfer za posebne namjene – elementarne nepogode, učešće općine“ će se koristiti za sufinansiranje projekata otklonjanja posljedica elementarne nepogode, u skladu sa zaključcima Općinskog načelnika, a na osnovu prijedloga Službe za civilnu zaštitu.

Sredstva utvrđena u Budžetu za sufinansiranje troškova prijevoza učenika koristit će se za subvencioniranje prijevoza učenika na osnovu Odluke Općinskog vijeća.

Član 27.

(Grantovi neprofitnim organizacijama)

Sredstva utvrđena u Budžetu, pozicija „Grant za razvoj poljoprivrede“ koristiće se za podršku primarnoj poljoprivrednoj proizvodnji. Način realizacije ovih sredstava uredit će se posebnim Programom koji donosi Općinsko vijeće na prijedlog Općinskog načelnika.

Sredstva utvrđena u Budžetu, pozicija „Grant za Start up inkubatore“ koristit će se za finansiranje projekata mladih s područja općine, a u skladu sa programom koji donosi Općinsko vijeće na prijedlog Općinskog načelnika.

Sredstva utvrđena u Budžetu, pozicija „Grant za kulturne i sportske manifestacije - Dani poljoprivrede“ koristit će se za sufinansiranje manifestacija od značaja za općinu Velika Kladuša, a na osnovu programa kojeg donosi Općinsko vijeće na prijedlog Općinskog načelnika.

Sredstva utvrđena u Budžetu, pozicija „Grant za Sportski savez“ koristit će se u skladu sa Zakonom o sportu USK-a, na osnovu plana i programa Sportskog saveza.

Sredstva utvrđena u Budžetu, pozicija „Grant za sufinansiranje razvojnih projekata i projekata EU“ koristit će se za finansiranje projekata prekogranične saradnje iz sredstava EU kao i za druge projekte koji će se realizirati tokom godine na osnovu ugovora, memoranduma, sporazuma i drugih oblika međusobnih dogovora potpisanih između Općinskog načelnika i insitucija donatora.

Sredstva utvrđena u Budžetu, pozicija „Grant za Crveni križ“ koristit će se za sufinansiranje Općinskog crvenog križa Velika Kladuša u skladu sa Zakonom o crvenom križu Federacije BiH („Službene novine F BiH“, broj: 28/06), a raspoređivat će se na osnovu pismenog zahtjeva Crvenog križa u skladu sa zaključkom Općinskog načelnika.

Sredstva utvrđena u Budžetu, pozicija „Grant za učenike generacije“ koristit će se u skladu sa zaključcima Općinskog načelnika, a za dodjele nagrada učenicima generacije srednjih i osnovnih škola.

Sredstva utvrđena u Budžetu, pozicija: „Grant za kulturne i sportske manifestacije, 4 kladuška doba,“ koristit će se za finansiranje manifestacija tokom godine, a na osnovu programa kojeg donosi Općinsko vijeće na prijedlog Općinskog načelnika.

Sredstva utvrđena u Budžetu, pozicija: „Grant za sufinansiranje sportskih aktivnosti i projekata“ koristit će se za finansiranje ili sufinansiranje projekata sportskih kolektiva u skladu sa posebnim programom kojeg donosi Općinsko vijeće na prijedlog Općinskog načelnika.

Grant za vijeće mladih općine Velika Kladuša koristit će se za finansiranje troškova zakupa prostora za vijeće mladih u objektu vlasništva JKP „Vodovod i kanalizacija“ doo Velika Kladuša.

Sredstva utvrđena u Budžetu, pozicija: „Grant za MFS EMMAUS V.Kladuša,"Jedan obrok dnevno" koristit će se za sufinansiranje obroka građanima Općine koji su u stanju potrebe a preko humanitarne organizacije Emmaus koja radi i djeluje na području Općine Velika Kladuša.

Sredstva utvrđena u Budžetu, pozicija „Tekući transfer za parlamentarne političke partije“ rasporedit će se na korisnike u skladu sa utvrđenim procentualnim rasporedom iz Zakona o finansiranju političkih stranaka na nivou BiH („Službeni glasnik BiH“, broj: 95/12 i 41/16), i to:

- a) 30% sredstava dijeli se jednako svim političkim subjektima koje su osvojile mandat;
- b) 60% sredstava dijeli se prema ukupnom broju osvojenih mandatnih mjesta, koje svaka politička stranka ima u trenutku dodjele mandata;
- c) 10% od ukupnog iznosa raspoređuje se na političke stranke srazmjerno broju mandata koja pripadaju manje zastupljenom spolu.

Sredstva utvrđena u Budžetu, pozicija „Tekući transfer udruženjima građana“ koristit će se za sufinansiranje projekata udruženja građana sa područja Općine, a u skladu sa Odlukom općinskog vijeća o finansiranju i sufinansiranju projekata organizacija civilnog društva, odnosno nevladinih i neprofitnih organizacija koje djeluju na području općine Velika Kladuša („Službeni glasnik općine Velika Kladuša“, broj: 7/12).

Sredstva utvrđena u Budžetu, pozicija: „Sredstva za finansiranje projekta, Izrada plana upravljanja otpadom“ koristit će se za izradu predmetnog plana, na osnovu ugovora potpisanog nakon provedenog postupka javne nabavke.

Sredstva utvrđena u Budžetu, pozicija „Sredstva za održavanje općinske deponije“, koristit će JKUP „Komunalije“ doo Velika Kladuša za radove redovnog održavanja deponije, po osnovu naloga općinske inspekcije.

Sredstva utvrđena u Budžetu, pozicija „Sredstva za finansiranje projekta saniranje divljih deponija“ koristit će se za finansiranje projekta „April mjesec čistoće“ odnosno drugih troškova u vezi sa sanacijom divljih deponija na području općine Velika Kladuša, a čiju realizaciju i utrošak sredstava će pratiti Odsjek za inspeksijske poslove.

Sredstva utvrđena u Budžetu, pozicija „Dani borbe protiv droge“ koristit će se za finansiranje projekta borbe protiv droge na osnovu programa kojeg donosi Tim za koordinaciju u borbi protiv droge.

Sredstva utvrđena u Budžetu, pozicija: „Sredstva za finansiranje izgradnje skloništa – namjenska sredstva koristit će se za tekuće održavanje postojećih skloništa u skladu sa

potpisanim ugovorima nakon provedenog postupka javne nabavke na osnovu odluka Općinskog načelnika.

Korisnici budžetskih sredstava dužni su, po okončanju projekta ili realizaciji odobrenih sredstava, dostaviti nadležnoj službi izvještaj (narativni i finansijski) o namjenskom utrošku sredstava sa odgovarajućom finansijskom dokumentacijom, a najkasnije do okončanja budžetske godine, što je preduslov za dalje finansiranje.

U slučaju nepoštivanja odredbi iz ovog člana, Općinski Načelnik može svojom Odlukom zaustaviti finansiranje korisniku budžetskih sredstava za tekuću godinu, odnosno isti ne mogu biti korisnici budžetskih sredstava za narednu godinu.

Za korisnike sredstava po grantovima koji dodijeljena sredstva ne utroše u skladu sa namjenom za koju su odobrena i ne dostave adekvatan izvještaj, pokrenuće se postupak povrata sredstava u budžet.

Član 28.

(Subvencije javnim preduzećima)

Sredstva utvrđena u Budžetu „Subvencije javnim preduzećima“ koriste se u skladu sa usvojenim budžetom tj. javno preduzeće Veterinarska stanica koristi sredstva za slijedeće namjene:

1. Sufinansiranje projekta kastracije pasa lotalica u skladu sa internim aktom koji donosi Općinski načelnik na prijedlog Službe za poduzetništvo, lokalni razvoj i implementaciju projekata.
2. Sufinansiranje provođenja monitoringa zaraznih bolesti goveda u skladu sa internim aktom koji donosi Općinski načelnik na prijedlog Službe za poduzetništvo, lokalni razvoj i implementaciju projekata.
3. Subvencije za veterinarstvo, predviđenim sredstvima sufinansira se izdavanje potvrde o provedenim obaveznim mjerama zaštite životinja (goveda) za poljoprivrednike.

Javno preduzeće Radio televizija Velika Kladuša koristi sredstva za sufinansiranje rada RTV Velika Kladuša, u skladu sa Programom kojeg usvaja Općinsko vijeće.

Sredstva utvrđena Budžetom za JZU Gradska apoteka Velika Kladuša koristit će se za sufinansiranje rada i poslovanja Gradske apoteke, u skladu sa Programom kojeg usvaja Općinsko vijeće.

Sredstva utvrđena u Budžetu na poziciji: JKUP „Komunalije“ doo Velika Kladuša – realizacija razvojnih projekata JKUP Komunalije i zavisnih društava“ koristit će se za sufinansiranje tekućih troškova rada javnog preduzeća, a u skladu sa Programom kojeg odobrava Općinski načelnik.

Sredstva utvrđena u budžetu na poziciji JKP „Vodovod i kanalizacija“ doo Velika Kladuša koristit će se za sufinansiranje tekućih troškova rada javnog preduzeća, a u skladu sa Programom kojeg odobrava Općinski načelnik.

Član 29.

(Subvencije privatnim preduzećima i poduzetnicima)

Sredstva utvrđena u Budžetu, pozicija: Subvencije za lokalne medije koriste se za sufinansiranje rada privatnih lokalnih medija na području općine, a u skladu sa Programom kojeg donosi Općinsko vijeće na prijedlog Općinskog načelnika.

Sredstva utvrđena u Budžetu, pozicija: Subvencije za veterinarstvo, privatna veterinarska stanica koriste se za sufinansiranje izdavanja potvrde o provedenim obaveznim mjerama zaštite životinja (goveda) za poljoprivrednike, koje izdaje privatna veterinarska stanica, a odobravat će ih Općinski načelnik na osnovu akata nadležne Službe za poduzetništvo, lokalni razvoj i implementaciju projekata.

Sredstva utvrđena u Budžetu, pozicija: Subvencije obrtnicima i poduzetnicima koristiti će se u skladu sa Programom kojeg donosi Općinsko vijeće na prijedlog Općinskog načelnika.

Član 30.

(Drugi tekući rashodi)

Sredstva utvrđena u Budžetu, pozicija: „Ostali tekući rashodi, nabavka adresnih pločica“ koristit će se za nabavku i ugradnju adresnih pločica na objekte fizičkih i pravnih lica na osnovu zaključenih ugovora sa odabranim ponuđačem, nakon provođenja postupka javne nabavke.

Sredstva utvrđena u Budžetu, pozicija: „Subvencioniranje troškova i održavanje zgrade za socijalne kategorije“ koristit će se za troškove koje će Općina snositi za održavanje objekta zgrade za socijalne kategorije koja je izgrađena u sklopu projekta CEB II.

Sredstva utvrđena u Budžetu, pozicija: Provođenje izbora u mjesnim zajednicama koristit će se za finansiranje troškova provođenja izbora u mjesnim zajednicama u skladu sa Odlukom Općinskog vijeća.

Član 31.

(Kapitalni transferi - grantovi)

Sredstva utvrđena u budžetu, pozicija: Sufinansiranje izgradnje i opremanje školskih objekata koristit će se za sufinansiranje projekata izgradnje i opremanja školskih objekata, a u skladu sa odlukom koju donosi Općinski načelnik na prijedlog nadležne službe.

Sredstva utvrđena u budžetu, pozicija: Sufinansiranje dogradnje objekta JU Dječije obdanište V.Kladuša koristit će se za sufinansiranje projekta dogradnje objekta gradskog vrtića, a u skladu sa potpisanim sporazumom između dvije institucije.

Sredstva utvrđena u Budžetu, pozicija: „Kapitalni transferi javnim preduzećima“ podrazumijevaju isplatu sredstava ekoloških naknada koja se obezbjeđuje od nadležnog kantonalnog ministarstva a realiziraju putem javnih preduzeća ili javnih ustanova. Isplate će se vršiti nakon izvršenih poslova u skladu sa potpisanim ugovorima o provedenim postupcima javnih nabavki.

Sredstva utvrđena u Budžetu, pozicija: Nabavka i izgradnja hidranata putem JKP „ViK“ doo Velika Kladuša koristit će se za izgradnju hidranata na području općine, a na osnovu akata Općinskog načelnika i nadležne službe.

Sredstva utvrđena u Budžetu, pozicija: Projekat vodovoda Stabandža koristit će se za dovršetak projekta izgradnje vodovoda Stabandža a realizirat će se preko JKP „Vodovod i kanalizacija“ doo V.Kladuša.

Član 32.

(Nabavka zemljišta i ostalih materijalnih sredstava)

Sredstva utvrđena u Budžetu, pozicija „Sredstva eksproprijacije“ koristit će se za rješavanje imovinsko pravnih odnosa, a na osnovu postignutih sporazuma o otkupu zemljišta vršit će se isplate fizičkim i pravnim licima u skladu sa zaključcima Općinskog načelnika.

Član 33.

(Nabavka građevine)

Sredstva utvrđena u Budžetu, pozicija „Izgradnja skloništa – namjenska sredstva za izgradnju skloništa“ koristit će se za finansiranje projekta izgradnje skloništa u skladu sa zakonskim propisima koji definišu pravila i način trošenja namjenskih sredstava za skloništa.

Sredstva predviđena na ekonomskom kodu Izgradnja vanjske rasvjete koristit će se za izgradnju nove mreže javne rasvjete, nakon provedenog postupka javne nabavke, u skladu sa Zakonom o javnim nabavkama BiH, kojeg provodi Jedinostveni općinski organ uprave.

Član 34.

(Nabavka opreme)

Sredstva utvrđena u budžetu, pozicija „Namještaj, kompjuterska oprema, nabavka softvera, oprema za katastar, ostale kancelarijske mašine, motorna vozila“ koristit će se za finansiranje nabavke opreme, izvršavat će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Član 35.

(Nabavka stalnih sredstava u obliku prava)

Sredstva utvrđena u budžetu, pozicija „Ulaganja u tuđa stalna sredstva - izgradnja objekata mjesnim zajednicama“ koristit će se za finansiranje projekata izgradnje objekata mjesnim zajednicama, a izvršavat će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Sredstva utvrđena u budžetu, pozicija „Izrada prostorno planske dokumentacije“ koristit će se za finansiranje projekata izrade prostorno planske dokumentacije, a izvršavat će se u skladu sa potpisanim ugovorima nakon provedenog postupka javne nabavke na osnovu odluka Općinskog načelnika.

Član 36.

(Rekonstrukcija i investiciono održavanje)

Sredstva utvrđena u budžetu, pozicija „Finansiranje investicionog održavanja, zaštite, rekonstrukcije i izgradnje lokalnih cesta, gradskih ulica i nerazvrstanih cesta“ koristit će se za finansiranje projekata putne i ostale infrastrukture, a izvršavat će se na osnovu Programa kojeg donosi Općinsko vijeće na prijedlog Općinskog načelnika u skladu sa potpisanim ugovorima nakon provedenog postupka javne nabavke.

Sredstva utvrđena u budžetu, pozicija: Uređenje pješačkih površina centralnog gradskog područja koristit će se za popločavanje pješačkih površina centralnog gradskog područja, a izvršavat će se u skladu sa potpisanim ugovorom sa izvođačima radova nakon provedenog postupka javne nabavke.

Sredstva utvrđena u budžetu, pozicija: „Rekonstrukcija i adaptacija zgrade organa uprave“ koristit će se za rekonstrukciju unutrašnjeg prostora zgrade općine, a izvršavat će se u skladu sa potpisanim ugovorom sa izvođačima radova nakon provedenog postupka javne nabavke.

Sredstva utvrđena u budžetu, pozicija: „Rekonstrukcija zgrade JU Centar za kulturu i obrazovanje“ koristit će se za nastavak izgradnje objekta javne ustanove, a izvršavat će se u skladu sa potpisanim ugovorom sa izvođačima radova nakon provedenog postupka javne nabavke.

Sredstva utvrđena u budžetu, pozicija: „Rekonstrukcija i adaptacija zgrade Vatrogasne jedinice“ koristit će se za kapitalna ulaganja u zgradu Vatrogasnog doma u skladu sa potpisanim ugovorom sa izvođačima radova nakon provedenog postupka javne nabavke.

Sredstva utvrđena u budžetu, pozicija: „Investiciono održavanje zemljišta – vanjsko osvjetljenje i pločnici (Uređenje gradskog parka)“ koristit će se za uređenje donjeg dijela gradskog parka, a izvršavat će se u skladu sa potpisanim ugovorom sa izvođačem radova nakon provedenog postupka javne nabavke.

Sredstva utvrđena u budžetu, pozicija: „Investiciono održavanje zemljišta-vanjsko osvjetljenje i pločnici, Modernizacija i urbana revitalizacija platoa stambenog bloka u ul.Nurije Pozderca“ koristit će se za uređenje javne površine – platoa spred stambenog bloka, a izvršavat će se u skladu sa potpisanim ugovorom sa izvođačem radova nakon provedenog postupka javne nabavke.

Član 37.

(Izdaci za otplate dugova)

Sredstva utvrđena u budžetu, pozicija: „Otplate kredita domaćim financijskim institucijama“ koristit će se za otplate kredita EIB-a koji je zaključen sa Federalnim ministarstvom finansija radi realizacije projekta kanalizacije.

Član 38.

(Naredbodavac budžeta)

Za izvršenje Budžeta u cjelini je odgovoran Općinski načelnik Općine Velika Kladuša koji je i naredbodavac po Budžetu, a u slučaju privremene spriječenosti Općinskog načelnika za izvršenje Budžeta, odgovorno je lice koje Općinski načelnik ovlasti da ga privremeno zamjenjuje.

Član 39.

(Odgovornost za sredstva Budžeta)

Za zakonitu upotrebu sredstava koja se budžetom rasporede budžetskim korisnicima ili ostalim korisnicima budžetskih sredstava odgovorni su rukovodioci istih korisnika.

Član 40.

(Prioriteti izvršavanja budžeta)

U slučaju da tokom godine zbog neravnomjernosti prihoda Budžeta ili drugih nepredviđenih okolnosti Budžet privremeno dođe u poziciju da ne može redovno izvršavati predviđene obaveze, finansiranje se vrši po prioritetima.

Redoslijed prioriteta iz prethodnog stava:

1. Prenijete nepodmirene obaveze iz prethodnih godina,
2. Dospjele obaveze po kreditima,
3. Plaće sa porezima i doprinosima zaposlenih korisnika budžeta i paušali vijećnika,
4. Materijalna potrošnja budžetskih korisnika,
5. Druge dospjele obaveze prema poslovnim partnerima,
6. Obaveze prema korisnicima grantova.

Član 41.

(Zaduživanje i upravljanje dugom)

Općina Velika Kladuša može se zadužiti i izdati garancije u svrhe, na način, pod uvjetima i u obimu propisanim zakonom kojim se uređuje dug, zaduživanje i garancije u F BiH.

III – ZAVRŠNE ODREDBE

Član 42.

(Priznavanje prihoda i rashoda)

Prihodi i rashodi budžeta evidentiraju se po modificiranom računovodstvenom osnovu nastanka događaja, što znači da se prihodi evidentiraju u razdoblju u kojem postaju raspoloživi i mjerljivi, a rashodi se priznaju u trenutku nastanka obaveze.

Budžetski korisnici i šefovi službi odgovorni su za naplatu i ubiranje prihoda u svojoj nadležnosti i za izvršavanje svih izdataka u skladu sa namjenama.

Član 43.

(Primjena drugih propisa)

Na sva pitanja koja nisu regulisana ovom Odlukom, a tiču se načina izrade, donošenja, izvršavanja Budžeta, zaduživanja, duga, računovodstva, nadzora i revizije Budžeta, primjenjivat će se odredbe važećih zakonskih propisa.

Član 44.

(Kaznene odredbe)

Odgovorno lice budžetskog korisnika, nosilac izvršne vlasti, kao i drugo lice odgovorno za Budžet općine kaznit će se za prekršaj ove Odluke saglasno sa odredbama člana 102. i 103. Zakona o budžetima u F BiH („Sl. novine F BiH“, broj: 102/13).

Član 45.

(Stupanje na snagu Odluke)

Ova Odluka stupa na snagu danom donošenja, ima se objaviti u „Službenom glasniku općine Velika Kladuša“, a ista se odnosi na fiskalnu 2025. godinu i primjenjuje se od 01.01.2025. godine do 31.12.2025. godine.

OPĆINA VELIKA KLADUŠA
OPĆINSKO VIJEĆE

Broj: 01-04-152/24
Velika Kladuša, 30.12.2024. godine

